

石門文字禪

五

石門文字禪卷第十七

宋江西筠溪石門寺沙門釋德洪覺範著

門人覺慈編錄 西眉東巖旌善堂校

偈頌

摩陀歌贈乾上人

處處三門向南開青山綠水自圍裹鐘魚鳴時攤鉢
盂精粗隨分喫些箇一生受用只如此何用忙忙脚
踏火口閑莫說事留取吞飯顆眼明穿得針要自時
補破粥後眠一覺不著洩漲亦不起齋後行數步不
是肚膨也打過我不求世人世人不求我時時牽衣

領臃腫包頭渦一味怯風吹耳朵世上許多人枿枿
猶如蟻旋磨團團並頭爭什麼一籌輸與摩陀板頭
盤脚坐人言南嶽好奇峯七十朶廬山更是好瀑布
垂天雲淨色不受泥殿閣參差如畫出萬人圍遶看
登坐汝若學道便成佛汝若不學地獄禍眼看鼻孔
也尋常六月日頭甚熱火一籌輸與摩陀看屋臥喚
渠挽不來送渠推不可摩陀摩陀無如之何問著不
答好啞大哥

讀禪要法

天王如來現于世文殊思往問法義便遭貶向鐵圍

山須臾復攝文殊至文殊拜起依位住問我此謫坐
何過佛言汝自墮艱難故起現行爲不可佛邊女子
名離意端然入定方七歲又問何以不逐之佛言此
女久無意女以無意逐獲免十方來衆何不遣如來
自在神足禪有意測之近成遠

送端上人入黃龍

一箇面如櫟子大眼耳鼻舌分疆界觸體裏面都不
言聽渠外邊爭捏怪日用經行坐臥中一段光明沒
遮蓋端上人會不會會與不會俱窒礙如見靈源瞋
睡翁石火光中著精彩

好菩薩

好菩薩人中來好菩薩羊中來女媧弄土飛塵埃洛陽樓閣非願力衆生業影空崔嵬苾芻心不在法道鮮衣美食何爲哉好菩薩人中來好菩薩羊中來女媧弄土飛塵埃

慎姪來侍求偈

十方都盧是箇虎玄沙斫柴見不怖傍却報僧云是汝言中有響今誰悟華林年少相體解庵中與之同行住誰會呼作大小空癡兒見之毛卓豎我居十年無侍者呼喚應時隨指顧有人問著是何宗萬里無

雲霜月苦

變禪者歸蔣山見佛果乞偈

霸陵將軍萬人敵射虎飲羽馬躡易下馬視之輒一笑寧知虎爲草中石控弦復射又中的嗟然有聲箭不入將軍但知爲石耳坐令疑虎心相失諸方今誰達此機蔣山老勤默而識變公心挂蔣山雲浩然欲歸約不得洞庭青草水粘天高帆摩空一千尺仰看浪摧碧玉山此時法界毛端集

送逸禪者歸荆南見無盡居士

長沙大蟲方肉醉倚樹病癢威見尾逸禪來展寂子

機舉足欲促適其睡後身荊州張曲江解鍛佛祖如
老龐如聞去作丹霞問正當一口吸西江西江一口
吸得盡是汝法身應有賸要令川客讀此詩都作蔣
山吞栗硬

警策

汝未辦道業何能超塵累但觀身精進則知心猛利
日中乃當食食不敢盡味夜分而後寢寢不敢熟睡
貪入光明想貪證法明智是名心出家是名身出世
大哉無累神合此有道器若具所行心件件俱不是
而稱釋氏子動止是羞愧

雲庵和尚生辰燒香偈

直心是道無虛假是牛何曾呼作馬平生日日常一
般但知九旬爲一夏聲色崢嶸爭蓋覆法身散失無
尋處因緣時節屬今朝不用追求全體露七十八年
彈指過元來諸數不曾墮南臺再拜炷爐香重渠當
時不說破

雲庵生日空印設供作偈福嚴南臺萬壽三老
與焉次韻

不見叢林老陝西鐵牛生得石牛兒泐潭樸面紅塵
起四海禪流滿肚疑瀉山作人熱心肺冷處著火人

方知龍山說偈聊戲耳萬象驚叫天魔悲三生大士
視雲漢和倡四座知爲誰南臺拱讀萬壽笑生機妙
語皆臨時諸方傳誦著精彩不是龍山唱和詩

欽禪者乞偈

三世如來所說開遮或擒或縱一切微塵句偈只明
衆生日用譬如一室千燈其光不雜不共無色天女
擊鼓四大部洲頭痛一切智智清淨開合不成痕縫
欽禪一等行脚莫聽虜子取奉若說有法可傳但作
眼見鼻孔

宣上人天真庵

醉李宣道者活計太天真把茅蓋頭處只就松樹身
樹邊有石兩三塊便與傾倒爲比隣眼子岑律竒寂
寂亦惺惺却倩松風替說法而石側耳聽宣公咄云
直饒聽得如噐盛水瀉也是外來之何如我此橫
眠坐睡佛祖一齊喪氣

題草衣巖

祝融凌寒空方陟緣雲徑此山翠被重有巖如側磬
拂石聊枕肱便覺諸緣靜萬瓦粲霜曉千里增目迥
石頭有高弟衣草却心病千年續燈人誰接懸絲命
送先上人親潛庵

潛庵九十一自是百歲人造物偶遺漏頓置漳水濱
先禪江西來邈得渠儂真展挂雪色壁毛髮皆精神
三玄合水乳五位透金塵譬如百衲帔歲晚思惠新
臊僧不肯信眼肉懸千斤飛兔略燕楚斂若臂屈伸
衲子參活意擊電飛機輪寧如臊僧徒蠢蠢粘唾津
珪上人兩過吾家旣去作此

牛鳴馬不仰火必就燥地應真隱耽源寂子一再至
至言無緣飾大道甚簡易三關不卻人見者自擬議
法身忽有賸佛祖俱喪氣君看暮歸人徑去方掉臂
送親上人乞食三首

荆簪女上採桑盡鴟女衣羅紈赤脚人趁兔鹿著靴
人飽食肉百丈出家不害癡一日不作一日飢後生
十指不點水得便宜是落便宜親禪學道不檐板自
然公辦私亦辦新年持鉢走衡湘要令一衆毛孔香
雖應鋒機不是語句鴨寒下水雞寒上樹不妨辦衆
推究自己一手摸魚一手扞水推開三玄玉鎖揩拭
同真十智要知天下南臺口含三十六齒夜歸候門
立地笑眼腦癡憨肚裏峭緣來點鐵成金法白揣與
人人不要

以有夢幻身安能躡飢渴剃頭捨飾好則以乞爲活

鍊盡世間心方稱閒披衲格言非汝欺餘塵尚諸學
吾師三界尊食時亦持鉢春風吹湘雲萬峯寒踢卓
出門一句子團團生四角

讀龍勝尊者語

鼓聲無作者有作必有處乃知畢竟空誑惑凡耳故
鏡象無生滅生滅則有體乃知畢竟空誑惑凡眼爾
以我如實知法無心外者若人見自心一切如幻化
花藥英禪師生日其子通慧設齋作此

甲辰臘旦底時節太虛完全無一缺陷虎機參陝右
禪罵人背是新羅鐵雲居老子最精銳長笑師兄難

控制龍象蹴踏非驢堪驚王擇乳非鴨類睡快庵中
知見香試焚一鉢熏十方不在鼻端空與木畢竟此
香何處藏

四偈

并序

和州褒禪山二禪者甲乙俱學於長老允平平稱乙
才敏甲忌刻日夕以計傾之平用之作維那甲愈怒
以恚語侵平平不得已用爲監院於是乙怨羞列其
下不勝其忿首於官曰甲嘗焚毀九曜幘子官囚甲
甲稱平所教坐此平編管利州甲編管洪州甲見余
哀訴曰吾未死猶復乙也余憫其爲嗔火所焚蓋差

緣耳始俱學道極善緣也中相忌以私緣差耳終至
於累其師作四偈以勸學者此風殆不可長也

妬忌之火焚燒善根增惡果報壞好名聞以著我故
見慢增勝瞋所蓋纏心不清淨大則壞國小則殺身
從古至今數如沙塵既會怨憎當衣慈忍如是進者
名真隨順

見勝進者心生嫉妬以苾芻相包蛇虺怒不敢以身
而先天下三人同行必有師者孔老之聖行已如此
奈何懷瞋而稱釋子子以緣差我故痛告盡世間心
乃可學道

瞋恚現行時無明所迷醉不知自之失但見他人是
如人在暗處見外不見裏大哉聖人學事事必求已
曹谿傳祖位夜春先屈身童子誦句偈乃稱曰上人
南山證果位天神常伏膺自以本持律不敢稱大乘

日用

晝爲情緣夜爲惡想譬如血脉流注不斷笑喜怒罵
折旋俯仰我觀個中無三界相山河大地與意俱喪
十方分身向此安葬耳中有塵捕風縛響舌頭無骨
如拳展掌嬰兒哆啞語無背向終必得物人不敢誑
是堅密身獨露萬象纔落意地卽同侶伴

八月十六入南昌右獄作對治偈

那落迦中論劫受苦焚鐵其地汁銅其柱魚鱗而鬻
瓜分而鋸於一日夕有萬痛楚我避世紛重閉其戶
而此知識勃然而怒吏收付官於此土住自尋其罪
焦茅石女然非天人所能見與自業成熟現行會遇
受盡還無無可措慮我作是觀上契佛祖

食不繼偈

觀餓鬼趣論劫飢渴針鋒其咽火聚其髮晝夜號呼
百千死活我常飽暖今暫缺乏當生大悲入此觀法

讀巖禪師錄